

SUHAND YUDAS

Kaatono Wamba

Suha aini nomai'ao ne Yudas, bhahitieno Yakobus. Bheanea Yudas ini nopototo bhe Yudas, bhahitieno dua Ompu Yesus (Mat 13:55). Weo suhano ini, Yudas nofofohato so dakodhaga'ao ne mie mpahaguru-guruno. I'ino suha nopoangkuni bhe i'ino suhano Petrus kahaa pakuno, nesalo umati marasaeano sadhia damintahaki kaparasaeano.

Kalengkano suha 1:1-2

¹ Suha aini nomai'ao ne Yudas, palima-limano Yesus Kristus bhe bhahitieno Yakobus. Suha aini abuhie so kosasawindo mie nepili bhe nemoasi'aono Lahata'ala Amantoomu bhe nedamba'ao so Yesus Kristus. ² Sio-siomo napobhaiangkoomu rahamati, kato-hopono dadi bhe kanini kaasino Lahata'ala pontalabhi-labhino.

Kahukumu so mpahaguru-guruno 1:3-16

³ Bhahitie'iku timoasi'aono! Apatudhu mpuu aebuhiangkoomu suha apuga-pugau'ao kasalamati toka ne'awantoomu. Tamaka aitu anamisie nofaraluu atumangahikoomu ne suha aini, so umulei'omu lalomiu potundu'ao kaparasaeamiu toka newa'aono Lahata'ala ne umatino mongkilono. ⁴ Kapa'amo nonandoo mie mekase-kasepeno ne olotamiu itu. Andoa itu mie modai mebhansu-bhansuleno bhihitano rahamatino Lahata'ala nembali kasalawando damolua nafusuundo. Andoa dogagai Yesus Kristus, Kafeompu'a bhe Omputo Kaseemie-mie'ano. Mpini wawono kahukumu so andoa ini toka notibuhi weo Kitabi.

⁵ Aitu nandoo so nefe'ulai'aoku ne hintimiu. Ampamo kaowu sakotu'uno kosasawi'ae na'a pande'aanemoomu. Ingka tandai'eomu peda amai Ompu Lahata'ala nofosalamati umatino Israel mai'ao we witeno Mesir, tamaka pada ana'a tapa marasaeano

nofobinasada.^a ⁶Fe'ulai'eomu dua mala'ekati lumimbakino kantee-no kuasando, sampe dohunsa kaeate'ando. Mala'ekati andoa ini nogogantuda Lahata'ala weo kahohondo, nepakeanda hante suhue dhamani bhe notaamida ampa nahumato oleo bhalano so kafo-bhitahaki'a. ⁷Fe'ulai'eomu dua kotano Sodom bhe Gomora bhe liwu-liwu poma'oti'ano. Podiundo miendo kota aini tanopototomo dua bhe habundo mala'ekati sa'ituini: dehabu sabhaha diu pokawite-wite bhe dopokagaa-gaa sapada mo'ane tawa sapada hobhine. Andoa ini dosikisaa'anda efi suhue dhamani, somo kafodhagando sabhaha mie.^b

⁸Pedamo dua mie nepulao'aoku sa'ituini. Andoa dopokamoni-monifi kaowu, sampe tadohabumo ampa kapoindalono mbadhando. Kuasano Lahata'ala dopisakie, dofeka'aebu dumadino weo kakalabhia te surugaa. ⁹Mahinggamo Mikael neangkando mala'ekati, miina nahumabu peda maitu. Wakutuuno nopotagali bhe Kafeompu'ando seetani bhaha'i la'ae so malano maeatino anabii Musa, Mikael miina naokadoa nameka'aebu Kafeompu'ando seetani na'a. Ampamo kaowu tanopugaumo ambano, "Lahata'ala so umamahakiko!" ¹⁰Tamaka mie andoa sa'ituini defolimba sabhaha wamba kafeka'aebu ne tapa nepande'aondo. Andoa itu tapedamo kadadi tapa kofekihi, nepande'aondo dodadi kaowu so mbadhando. Gaha'aitumo ana'amo so kabinasa'ando.

¹¹Dobalaamo andoa maitu! Andoa doangkafimo kaangka'ano Kain [mongkono aino],^c Sumanomo dae'awa dhoi, nokolilino toto no lalondo tado'o ho wutondo ne modai'ano, tapedamo Bileam.^d Andoa dabinasa mba'inomo dopoewangi bhe mintahano kuasa tapedamo Korah.^e

¹²Weo hame-hamendo umati notimolampi diundo, kapa'amo miina daoambanoa deagoi oti, tadofe'ulai kaowu wutondo. Andoa tapedamo olu nelola-lola'aono kawea tamaka miina naeowa use. Andoa tapedamo dua sau tapa kobhake mahinggamo ne tandai'ano nakobhake, mba'inomo padamo dobunae bhe pahapahakano, nomatemo sepali'a. ¹³Tapedamo ewo mo'osa we te'i neowa buha, andoa ini dofotiwoha diundo timoambano'aono.

^a 5 Kel 12:51; Bil 14:29-35

^b 7 Kej psl 19

^c 11 Kej 4:1-8

^d 11 Bil psl 22-25

^e 11 Bil psl 16

Andoa tapedamo dua kulipopo te lani tapa tumotono wawe. Lahata'ala tokamo nefontaa-ntaa'anda kaeate'a weo doloma mposo ampa suhue dhamani.

¹⁴Henok,^a sampu'a kafitu pulangano mai'ao ne Adam, nokosua-hamo dua peda anabii nopulao'ao andoa itu. Ambano, “Ondo itu, Ompu Lahata'ala namai napoowa bhe mala'ekatino mongkilon dantini hewu-hewu. ¹⁵Ompu Lahata'ala nabhitahaki kosasawindo mie, nahumukumu mie modai hampano habu modaindo, nahumukumu dua mie kodhosa pata sumombaino Lahata'ala mba'inomo sabhaha wamba kafeka'aebu nefolimbando ne Ompu.”

¹⁶Andoamo ini mie kamuntu-muntuno, sadhia dofo'ala mie bhaindo, doangkafi kapoindalondo modai'ano, dosangke-sangke wutondo bhe dokundeli mie bhaindo so de'awa'ao laba.

Katangahi so damekatangka'ao kaparasaea

1:17-23

¹⁷Tamaka hintimiu bhahitie'iku timoasi'aono, fe'ulai'eomu wambado rasulu'ino Ompuntoomu Yesus Kristus. ¹⁸Ingka tokamo dofohatokoomu wawo ambado, “Nama'o pandano dhamani datumba sabhaha mie so meelee-eleloomu, andoa ini tadadumadimo damangkafi kapoindalondo daehabu dhosa.” ¹⁹Andoamo maitu so meowano powengke-wengke'a, dadindo nokuasai'emo kapoindalono mbadha, Rohino Lahata'ala miina naeate weo totono lalondo. ²⁰Tamaka hintimiu, bhahitie'iku timoasi'aono, potulu-tulumioomu so nodhulu kamatangka'ao kaparasaeamiu ne Yesus Kristus; kaparasaeamiu itu nongkilo mpuu. Sambahea'omu weo kuasano Rohino Lahata'ala. ²¹Dhaganiomu wutomiu weo kanini kaasino Lahata'ala poowa ntaa-ntaa'omu oleono Ompuntoomu Yesus Kristus, so fowa'aono rahamatino, o dadi suhue dhamani. ²²Fotiwohae'omu kabhelano lalomiu ne poibhahano totono lalo. ²³Agoidaomu mie mai'ao weo efi, so dosalamati'ao. Fotiwohae'omu kabhelano lalomiu ne mie sigao'ano dua, tamaka poangka bhe mote'iomu. Bansie'omu mahingga pakea kapokahaku'ando dohabu sabhaha modai'ano, [bhasasaa notaihikoomu,

^a 14 Kej 5:18, 21-24

Kasongkono suha**1:24-25**

²⁴Fekakalabhia kaitaomu Lahata'ala kokuasano! Anoa nokuasa nodhaganikoomu keana titunoomu, keana dua bhe kadengono dhosa, bhe nosangka'ao kawulano lalomiu nahumato namowakoomu ne wiseno Wutono kumalabhiano. ²⁵Anoamo Kaseemie-mie'ano, Mosalamati kaitaomu noangka ne Yesus Kristus Ompuntoomu. Somo Anoa sabhaha kakalabhia, kafosibhala, ka'osa bhe kuasa notanda wawono, aitu bhe ampa suhue dhamani. Amin.